

皇朝經世文編

皇朝經世文編卷八十四目錄

兵政十五 海防中

臺灣始末偶紀

靖海侯施琅傳

平臺紀略總論

平定臺灣述略

上福節相論臺事書

蛤仔難紀略

論蛤仔難形勢

蛤仔難原始

論埔裏社事

論臺灣要害

臺灣城工可緩議

籌畫海寇疏

陳臺灣棄置利害疏

論臺鎮不可移澎書

謝金鑾

謝金鑾

謝金鑾

姚瑩

趙翼

鄭光策

王命岳

施琅

藍鼎元

發帑軍臺疆經理書

臺灣保甲責成鄉長書

請開臺灣米禁疏

請開臺民攜眷之禁疏

條陳臺灣事宜狀

治臺灣私議

條陳閩省利害疏

臺灣班兵議上觀鎮軍

覆趙制軍言臺灣兵事書

藍鼎元

藍鼎元

高其倬

吳士功

沈起元

沈起元

范承謨

姚瑩

姚瑩

皇朝經世文編卷八十四

兵政十五 海防中

善化賀長齡耦庚稿

臺灣始末偶紀

魯之裕

臺灣閩海諸島之饒也。幅員南北約三千里。東西踰六百里。漢番生齒百有餘萬。其產布穀金石牛馬齒革羽毛竹木絲枲蔗漆藥物。其番有生者熟者。其聚族而居之所曰社。合臺灣之社有三百五十焉。其社有生番有熟番。生者何不與漢率不達吾言語者也。熟者何。漢番雜處。亦言吾言語吾語者也。而總之射生飲血嗜殺果鬪挾其饒以致旁近諸島相爲犄角。明以前禁弗與通。隆萬間華人劉香老林道乾者賈其中。尋踞之。未幾爲顏思齊所奪。思齊者亦華人。習于倭而因以用之者也。思齊死。乃并入于紅毛。鄭芝龍之投誠也。子成功聞閩思得臺灣以苟存。臺灣之門戶曰澎湖。俗呼鐵門限。以其有吸鐵石焉。船至則膠。前此之所以不通也。至是洋人見王衣冠者乘巨鯤。時時往來衝突其間。踰月鐵石盡。成功適載輜重至。停泊澎湖。而使何斌誘諸番應于臺。紅毛守者不能拒。成功遂僭王其中。至康熙二十一年成功卒。子克塽來歸。朝命籍而郡縣之。置府一曰臺灣。縣三曰臺灣鳳山諸羅。監司一曰廈門道。更爲置南北二路營將弁。佐之以守備。分防之以千把四司。而總轄之以元戎。綦布星羅。制甚善也。蓋嘗綜其形勢而論之。閩粵江浙之賈舶出洋。皆不能越臺灣而別由乎他路者。固以其三千里之區曲。而抱乎東南海隅也。而澎湖則中枕乎臺之曲。以相犄角焉。形勝據而產復饒。此臺之治亂之所以易也。且臺之東所聯屬者爲呂宋琉球紅毛諸國。西南則交趾。又東則暹羅柔佛大年占城六昆皆近焉。直西則與麻六甲咬囉叭啞齊英圭藝荷蘭大西洋相通。北則日本朝鮮。直接乎盛京。要皆

可一帆而涉。遠者不踰旬日。近或旦夕間可達。蓋臺灣內濱于廣東福建浙江江南山東五省外。羅以數十餘國。臺灣而得潔已。愛人恤兵。明于治要者。柄之則五省以有所衛。而無虞于外患。而澳門廈門甯波崇明四口之貿易者。源源其來矣。如是而沿海之汎隘。俱可以無警。臺灣之治。忽其有關於內也。豈淺鮮哉。

靖海侯施琅傳

陶元藻

琅字尊侯。號琢公。晉江之海濱人。貌魁梧。方頤廣額。膂力絕人。比長。隨族父武毅伯於福軍中。時主兵者募壯士。有鼎重千鈞。命諸壯士舉。咸以不能對。惟琅從容舉之。環步數巡。仍還其所。衆乃異之。既而從戎討山寇有功。授遊擊。時唐王聿鍵僭號福州。授爲左衝鋒。嘗統偏師。逃入榛莽。有虎導之行。始與前軍會。前軍望見琅與虎偕。爭趨救。虎逸。琅笑曰。微虎我何由至此。衆大驚。唐王敗。鄭成功羅致之。爲左先鋒。相得甚。軍儲卒伍。及機密大事。悉與謀。嗣因成功將掠粵之惠潮。以佐餉。琅不可。成功勿懌。復有將弁犯法當誅。成功爲之解。琅不從。由是成功疑其背已。欲殺之。琅覺。宵奔自度土人皆成功牙爪。渡必不能脫。緣山而行。山故多洞。乃匿於洞中。俄而追者數十騎果至。火光燭天。大索嚴穴。琅所匿洞。忽生棘刺。索者不可得。歸報成功。成功喟然嘆曰。我固一患于中原矣。琅父大宣弟顯。遂被害。越數日。琅從洞中出。盡伏宵行。乃抵晉。從定遠將軍解福州圍。授同安副將。破瀝州壘。擒其騎將。降萬餘人。陞總兵官。旋陞水師提督。成功卒。子經猶據廈島。康熙元年。琅密陳金廈可取狀。上嘉納焉。卽命便宜行事。遂率將士搏其島。克之。降萬八千人。晉秩右都督。靖海將軍。入爲內大臣。封伯爵。而島旣破。經收殘卒數千。竄臺灣。僞將劉國軒以澎湖險要。據澎湖。經死。子克塽繼。士卒漸衆。仍抗命猖獗如初。二十年内閣學士李光地。又陳臺灣可取狀。并薦琅才可用。總督姚啟聖亦奏琅能。仍出爲

水師提督加太子少保駐廈門。明年六月將與師。籌畫指揮。統其權于制府。而親率其旅。在提督軍門。適候南風。或言不利於行者。琅曰。吾泊舟地。離賊遠。北風起。舟從風。颶散非二三日不能集。今夏至前後二十餘日。風微。浪靜。夜可泊。洋聚而觀。盪不過七日。舉之必矣。且國軒爲鄭氏梟將。澎湖破則臺灣不戰而自下矣。遂行入澎湖。道皆爲賊據。官軍不得泊。因次七罩灣。水駛石惡。忽潮漲。石盡沒。得平坦。以渡。國軒築短牆。置礮。環二十里。琅遣前鋒藍理等。奪艦直入。會南潮發。爲疾流所壓。賊船四合。琅親督大鯨衝其圍。總兵官吳英繼之。殺賊將大小七十。賊兵二千。取虎井桶鹽盤嶼。遂督師分三隊。東指牛龍山爲奇兵。西指牛心灣爲疑兵。中又分三股。攻賊堅壘。賊堅拒良久。總兵官林賢率先陷陣。大師繼至。呼聲振撼波濤。自辰至申。焚舟百餘。殺其將三百。兵萬二千有奇。凡海洋占候。雲合風生。雷鳴風止。將戰時。黑雲起。國軒方推牛置酒相賀。帳中忽聞雷鳴。賊軍皆錯愕。無措。遂大敗。遁歸臺。我軍乘勢趨臺灣。國軒就縛。克塽出降。果如出師時琅所料。蓋琅家於海濱。知澳島險易。又向依鄭氏。熟悉其上下軍情故也。臺灣平。琅由海道報捷。七日抵京師。而啟聖以飛騎由內地後。琅二日到京。仁皇帝嘉琅功。封靖海侯。世襲罔替。琅還朝。以步履難。命侍臣扶挾上殿。恩賚有差。年七十六卒於官。諡襄壯。子世綸。世範。范襲侯爵。驃爲水師提督。以康熙六十年朱一貴叛。征討有功。贈太子少保。諡勇果。其克臺灣亦以六月。與琅平臺之期。先後相符云。

平臺紀略總論

藍鼎元

臺灣治亂之局。迴出人情意計之外。其地方數千里。其民幾數百萬。其守土之官。則文有道。有府有縣令。大小佐貳雜職若干員。武有總兵副將參將遊擊守備大小弁目若干員。其額兵七千有奇。糧儲器甲舟車足備。又

當國家全盛。金甌靡缺。而朱一貴以假鴨小夫。歛焉倡亂。不旬日間。全郡陷沒。此豈智能所及料歟。太平日久。文恬武嬉。兵有名而無人。民逸居而無教。官吏孳孳以爲利藪。沈湎楊植。連宵達曙。本實先撥。賊未至而衆心已離。雖欲不敗。弗可得已。然鹿耳鯤身。夙稱天險。鄭氏一踞其間。遂歷三世。國家圖之數十年。費錢糧幾百千萬。而後能收之。今不動聲色。七日恢復。巨魁就擒。孽徒授首。良由我

聖祖仁皇帝德福齊天。神威遠

震。

諭旨遙頒。老幼無不感激流涕。蓋至仁厚澤。淪浹人心者深也。雖然。今日之奏勳。乃他年之龜鑑。知此

說者。其知未雨綢繆之道乎。臺灣海外天險。較內地更不可緩。而此日之臺灣。較十年二十年以前。又更不可緩。前此臺灣。止府治百餘里。鳳山諸羅。皆毒惡瘴地。令其邑者。尙不敢至。今則南盡耶嬌。北窮淡水。雞籠以上。千五百里。人民趨若鶩矣。前此大山之麓。人莫敢近。以爲野番嗜殺。今則羣入深山。雜耕番地。雖殺不畏。甚至傀儡內山。臺灣山後。蛤仔難。崇爻。卑南。寬等社。亦有漢人敢至其地。與之貿易。生聚日繁。漸廓漸遠。雖厲禁不能使止也。地大民稠。則綢繆不可不密。今郡治有水陸兵五千餘人。足供調遣。鳳山南路一營。以四五百里山海奧區。民番錯雜之所。下淡水耶嬌。盜賊出沒之地。而委之一營八百九十名之兵。固已難矣。諸羅地方千餘里。淡水營守備。僻處天末。自八里岔以下。尙八九百里。下加冬。笨港。斗六門。半線。皆奸宄縱橫之區。沿海口岸。皆當防汛戍守。近山一帶。又有野番出沒。以八九百里險阻叢雜之邊地。而委之北路一營八百九十名之兵。聚不足以及遠。散不足以樹威。此杞人所終夜思而不能寐者也。臺民好爲盜賊。不因飢寒。方慶削平。又圖復起。去歲平臺。大定之後。尙有布散流言。嘯聚巖谷。復謀作亂者數次。屢經撲滅。至歲餘始殄。而王忠一賊伏匿深山。至我

皇上卽位。乃克就縛。可見地方廣大。搜捕弗及。雖平臺僅在七日。而拔盡根株。東擒西勦。亦有

兩載艱難欲謀善後之策。非添兵設官經營措置不可也。以愚管見。劃諸羅縣地而兩之。於半線以上另設一縣。管轄六百里。雖錢糧無多。而合之番餉。歲徵銀九千餘兩。草萊一闢。貢賦日增。數年計頗然大邑也。半線縣治設守備一營。兵五百。淡水八里岔設巡檢一員。佐半線縣令之所不及。羅漢門素爲賊藪。于門內設千總一員。兵三百。下淡水新園設守備一營。兵五百。耶嬌極南僻遠。爲逸盜竄伏之區。亦設千總一員。兵三百。駐劄其地。使千餘里幅員。聲息相通。又擇實心任事之員。爲臺民培元氣。寇亂風災大兵六疫而後民之憔悴極矣。然土沃而出產多。但勿加之刻剝。二三年可復其故。惟化導整齊之均賦役。平訟獄。設義學。興教化。獎孝弟。力田之彥。行保甲民兵之法。聽開墾以盡地力。建城池以資守禦。此亦尋常設施耳。而以實心行實政。自覺月異而歲不同。一年而民氣可靜。三年而疆圉可固。五年而禮讓可興。而生番化爲熟番。熟番化爲人民。而全臺不久安。長治吾不信也。顧或謂臺灣海外不宜闢地聚民。是亦有說。但今民人已數百萬。不能盡驅回籍。必當因其勢而利導約束之。使歸善良。則多多益善。從來疆境既開。有日闢無日盛。氣運使然。卽欲委而棄之。必有從而取之。如澎湖南澳。皆爲海外荒陬。明初江夏侯周德興皆嘗遷其民而墟其地。其後皆爲賊窠。閩廣罷戢。乃設兵戍守。迄今皆爲重鎮。臺灣古無人知。明中葉乃知之。而島嶼盜賊後先竊踞。至爲邊患。比設郡縣。遂成樂郊。由此觀之。可見有地不可無人經營。疆理則爲戶口貢賦之區。廢置空虛則爲盜賊禍亂之所。臺灣山高土肥。最利墾闢。利之所在。人所必趨。不歸之民。則歸之番。歸之賊。卽使內賊不生。野番不作。又恐寇自外來。將有日本荷蘭之患。不可不早爲綢繆者也。閒居無事。燕雀處堂。一旦事來。噬臍何及。前轍未遠。可不爲寒心哉。

平定臺灣述略

趙翼

臺灣自古不隸中國。文獻通考云。泉州之東有島曰澎湖。澎湖旁有毘舍耶國。蓋卽是也。明嘉靖中。海賊林道乾爲俞大猷所逐。遁入臺灣。皆土番。道乾不樂居其地。殺番取其血固舟。入占城。天啟中有奸民顏思齊。引日本倭據之。鄭芝龍附焉。遂爲巢穴。崇禎元年。芝龍就撫。以其地餉荷蘭紅毛夷。我朝順治初。大兵下閩。芝龍降。其子成功不從。據金門。廈門諸島。屢爲患。十六年。自江南敗歸。十八年。夏。隨襲取臺灣。時荷蘭固守不肯下。成功告之曰。此地本先人故物。我欲得之耳。金帛悉以歸汝。荷蘭乃攜貲去。成功名臺灣曰東都。設天興萬年二縣。康熙元年。成功死。子錦襲。改東都爲東甯。縣爲州。增安撫司三。南北路及澎湖各一。其地肥饒。穀歲三熟。閩粵人爭趨之。日富庶。錦據以擾沿海地。無寧歲。二十年。錦卒。子克塽襲。僞將劉國軒鎮澎湖。二十二年。我靖海將軍施琅克澎湖。克塽國軒降。乃設臺灣府。及臺灣鳳山諸羅三縣。其地東倚山。西棲海。北至雞籠城。南至淡水。長千餘里。東西闊四五十里。或十餘里。山之東則層巒疊嶂。皆生番所居。打鹿爲食。不隸版籍也。六十年。奸民朱一貴倡亂。總兵歐陽凱戰死。府城及諸羅鳳山俱失。一貴稱義王。僭號永和。閩督滿保遣提督施世驤。總兵藍廷珍。以萬七千兵入平之。俘一貴。雍正元年。以諸羅北境遼闊。增設彰化縣。及北淡水同知。六十餘年以來。地大物賡。俗日益淫侈。奸宄因芽。襲其間。官斯土者。又日事陵削。會漳泉二府人之僑居者。各分氣類。械鬪至數萬人。官吏不能彈治。水師提督海澄公黃仕簡率兵至。以虛聲脅和。始解散。自是民狃于爲亂。豎旗結盟。公行無忌。淡水同知潘凱者。方在署。忽報城外有無名屍。當往驗。甫出城。卽爲人所殺。并胥役戮焉。當事者不能得主名。則詭以生番報。謂番性嗜殺。途遇而戕之也。使人以酒肉誘番。出醉而掩殺之。奏罪人已伏法。而殺人者實脫然事外。於是民益輕視官吏。而番亦銜刺骨。乾隆五十一年。彰化縣有林爽文者。恃其所居大。

理代。地險族繁。悉爲盜賊藪。閩廣間。故有所謂天地會者。爲奸徒結黨名目。爽文借以糾約。羣不逞之徒。嘯聚將起事。太守孫景愷至彰化。趣縣令俞峻。及副將赫生額。遊擊耿世文。率兵役往捕。不敢入。駐營於五里外之大墩。諭村民擒獻。否則村且燬。先焚數小村。怵之。被焚者實無辜也。爽文遂因民之怨。集衆夜攻營。全軍盡沒。赫耿俞皆死焉。時十一月二十七日也。明日賊乘勢陷彰化。孫守及都司王宗武。同知長庚。前同知劉亨基。典史馮啟宗。悉爲所殺。十二月六日。又陷諸羅。縣令董啟挺死之。淡水同知程峻。亦爲羣賊所害。鳳山縣有莊大田者。亦盜魁。乘亂起。十三日陷縣城。縣令楊大奎自刎死。惟府城有總兵柴大紀。及監司永福。同知楊廷理等。率兵民固守。賊屢攻不能破。而彰化之鹿港。賊已遣僞官來監稅。有泉民林湊等起義。擒之。是以府城鹿港兩海口俱未失。閩中聞變。黃仕簡率兵由廈門渡海入府城。陸路提督任承恩。亦率兵由蚶江渡海入鹿港。副將徐鼎士。由閩安渡海入北淡水。俱以五十二年正月初旬至。賊勢稍斂。黃仕簡命大紀北取諸羅。總兵郝壯猷南取鳳山。大紀連戰復諸羅。遂守之。壯猷南出二十里爲賊所阻。任承恩之至鹿港也。距大里杙賊巢僅四十里。亦以兵少不敢進。壯猷頓兵幾五十日。以二月二十一日始進復鳳山。鳳山空無人。招民復業。賊卽潛入其中。與外賊相應。三月十日城復陷。遊擊鄭嵩死焉。壯猷等遁歸府城。先是二月中。上見兩提督彼此觀望。恐不能速殄賊也。有旨令閩督常青爲將軍往督師。至是適至府城。人心稍固。閩督李侍堯甫莅任。卽預約廣督孫士毅調兵四千備緩急。而鳳山再陷之信至。立卽趣兵往。遂以三月末悉抵臺。賊方攻城急。賴以不陷。李侍堯又奏調浙兵三千。上益以駐防滿兵一千。令將軍恒瑞爲叅贊赴府城。提督藍元枚亦爲叅贊。分浙兵二千赴鹿港。有旨以失律誅郝壯猷。於是人心咸奮。出師有日矣。時賊雖猖獗。勢力尙未甚大。

各村民俱未爲所脅也。而諸將以五月二十四日出師。慮兵少或不敵。甫交綏。卽退。常青又請兵一萬。賊得以其暇。蠶食各村。不從者輒殺。於是遍地皆從賊。莊大田驅以擾府城。林爽文驅以擾諸羅。勢益熾。迨官兵從隣省調至。閩又守風。過海凡兩三月。則我兵僅增萬。而賊已增十餘萬矣。諸羅爲南北之中。林爽文必欲陷之。自六月中攻圍。連日夕不止。大紀與兵民共守。常青先後遣總兵魏大斌。參將張萬魁。遊擊田藍玉。副將蔡攀龍。貴林等三度往援。皆爲賊所截。張魏田蔡僅得入城。損兵大半。貴林及遊擊楊起麟。都司杭富等。皆被戕於城。諸羅之圍益密。入者不能再出。大紀告急之文。用小字書寸紙。募人間道夜行。始得達府。而賊禁粒米不得入城。攻益急。諸羅士民悉力拒守。凡百餘戰。幸皆不大岨。然已饑疲不能支。常青催恒瑞自府城赴援。時藍元枚已歿。則催總兵普吉保自鹿港赴援。各有兵五六千。俱以賊勢盛不敢進。孤城將旦夕陷矣。上念諸羅被圍久。特改名嘉義以旌士民。而先已預燭事幾。慮諸將不足恃。六月中卽調陝督福康安爲將軍。及內大臣海蘭察來統兵。并發明詔。聲言調兵十餘萬來滅賊。冬十月。所調蜀番及粵西兵五千先至。有旨官兵不必至府城。當卽往鹿港進。會颶風不得渡。守風於崇武澳。二十八日。忽得順風。一晝夜數百艘盡抵鹿港。海口檣竿如櫛。列數里。賊聞之不測多寡。謂真有十萬兵至。始懼。十一月八日。福將軍等起行。賊方列拒於崙仔頂。海蘭察率巴圖魯侍衛發矢殪十餘賊。賊卽披靡。海蘭察笑曰。此一羣犬耳。何畏。遂麾兵入。沿路復擊殺賊之伺隙者。至牛稠山再敗之。卽以是日抵嘉義。城中官民出迎。饑羸無人色。見將軍至。無不歡聲嗷泣。喜其來而悲其晚也。有山名小半天者。四面陡絕。賊遁而聚於此。十八日。百道仰攻。又克之。賊自倡亂以來。狙於官兵之持重不虞。此次之難抗也。遂遁歸大里杙。大里杙已築土城頗堅整。二十四日。官兵至。賊猶數萬出拒。退而復集。

者數次。既夕。我兵伏溝間。賊萬炬來索戰。我兵在暗中。賊不能見。而我兵視賊。則慄慄可數。發槍箭。無不中賊。自知失計。遽滅火。復擊鼓來攻。我兵又從鼓聲處擊之。殺死無數。黎明。遂克其城。林爽文已攜孥走。據守集集埔。其地前臨大溪溪之上。就高岸。壘石爲陡牆。長數里。其所預營扼險處也。十二月五日。官兵騰而上。殺千餘人。於是賊黨皆潰。林爽文先匿其孥於番社。惟與死黨數十人。竄窮谷叢箐中。十三日。先獲其孥。五十三年正月四日。林爽文潛出覓食。遂擒之。而莊大田之在南也。雖與林爽文同逆。又各自號召。不相下。乘官兵未南下。益焚掠。聚糧爲旅拒計。已又思出降。計未定。而將軍已於十六日至牛莊。大田倉猝出拒。敗而走。官軍追之。累戰皆捷。極南有地名耶嶠者。貢山臨海最遼阻。莊大田與其黨潛匿焉。將軍先遣水師由海道繞而截之。於水。自以大兵環山圍之。賊衝突不得出陣。殺者數千。溺海者數千。擒而戮者亦千餘。莊大田亦就獲。臺灣平。

上福節相論臺事書

鄭光策

一宜出奇兵以覆賊巢也。賊之根本在彰之大里杙。其可以翹此巢穴以爲牽制者。則鹿仔港與淡水兩處之兵。但鹿港傍海。地處其下。又隔以大肚溪之險。路徑叢雜。傍山一帶。賊皆據險守望。仰以攻之。其勢稍難。若淡水則重關疊隘。高據崇山。望下情勢了然在目。出大甲溪數里。據牛罵山頭。卽望見大里杙。且其地平坦。依海而西。則連於鹿港。依山而東。則直搗賊巢。此誠用閒出奇之勢也。淡防同知徐夢麟雖文職。然曾閱其文報。才具曉暢。似可倚以辦賊。彼處守爲徐鼎士。亦與徐君協心。前曾屢請進兵。乘虛搗賊。但兵力尙弱。僅足以自守。鄙意鹿港淡水兩處皆爲要區。若得會合兩處之兵。徑攻賊穴。則賊必還而自救。南路之圍。不攻自解。若使賊不及防。而得破其巢。則根本既翹。勢更潰散。此兩處不可不速爲謀畫。且鹿港新失大帥。人心搖惶。而淡水又

爲賊之後戶。恐爲大兵所蹙。或謀奔突北竄。淡水地多險隘。又多富莊。後通內山。路尤深奧。若令賊首竄入。必難收拾。宜於現在兵內。再截留數千。分作兩枝。一枝當命一大帥帶領將弁。副以餉銀糧米。直趨鹿港。會同淡水。以攻賊巢之前。其一枝亦宜精選驍勇有智謀者。助以餉銀。不須糧米或由五虎門。或由蚶江配船徑往淡水。以助二徐。爲攻賊巢之背。內則防其竄逸。外則批亢擣虛。或令分兵以連絡鹿港之聲勢。俟大兵雲集。卽尅期同時并舉。賊之腹背受敵。勢必不支。此亦一要機。不可失也。至大里杙山後生番各處。亦宜并檄徐君購通。毋令賊首竄入。

一宜招義勇以厚兵威也。官兵與義勇互相爲用。無官兵則義勇之勢不壯。無義勇則官兵之用不靈。二者不可偏廢。然究其得力。義勇實便於官軍。蓋官軍地勢不明。音語不通。登涉險阻。未必皆屬歷練。不便一也。官軍來自長途。力已困敝。又兼以渡海風濤。水土不服。易生疾病。且人非土著。無所繫累。未必皆具敢鬪必死之心。其不便二也。官軍遠方赴召。又隔以海潮風汛。緩急不能應時。前之所召者。或疲病死亡。後之所赴者。又祇足補缺。所召雖多。不能一時并集。且沿途勞費。不如義勇易於購募團結。其不便三也。臺地山林叢雜。谿谷險隘。將來賊首勢敗。其黨夥必逃竄深山。搜捕殊爲費力。惟用土人以招土人。彼有恃則易降。用土人以購土人。其踪跡亦易得。此官軍不如義勇之便四也。且賊所殘破之地愈多。則流離愈衆。我此時不招爲義勇。其桀驁不馴者。必資於賊。是愈長賊鋒。卽負騎牆之見者。不見從我之爲利。亦難以款動餘衆。其當用義勇五也。又按全臺攻守大勢。南望鳳山。中固府城。北攻賊爽。兼用閒道以援諸羅。又進而助鹿港。助淡水。地將千里。分戰守而計。非每處用兵萬人不可。且自府城至諸羅。諸羅至彰化。遙遙百數十里之地。中無數枝重兵屯駐。策應使步。

步爲營。隨進隨守。隨用以招撫。以自固其後。則其勢必不免爲賊所兜圍。否則既進之後。亦必爲賊所邀截。諸羅援兵。所以屢通而屢梗者。坐此病也。現在臺地兵額。除死傷病廢。其尙存而可用者。度不能過三萬。義民之額。又隨口糧之有無。以爲聚散。時繼時羸。然合兵而計。其數亦不過五萬。以之爲守。或僅足以支。以之爲戰。必不敷於用。所召各省之兵。聞又不及萬人。聚之則勢孤。散之則力薄。此其情勢。更不可不亟增義民。厚其糧餉。命各處再募數萬人。或卽團爲土兵。以爲聲勢。庶敷調遣。若謂義勇多係流亡。苟且糧食之人。無濟於用。竊又以爲不然。凡兵之勇怯。在乎將之能撫卹訓練。得其歡心與否。果得其心。雖驅市人以戰。可也。且賊之始事。其陰謀團結者。亦不過數百人。其餘皆烏合之衆。然何以喧囂一呼。力拒官兵者。每處動以萬計。蓋以賊每得勝。歸必立犒牛酒。死亡者屍必搶歸。而我軍每事限於軍需。則例於義勇所給發口糧。及一切卹死賞功之令。反未能盡行。又風聞每遇爭戰。官軍多驅義勇爲前行。及歸論功。義勇又常居後。既不足以得其歡心。又何以致其死力。聞臺地諸義勇。惟臺防同知楊廷理所募。撫卹最爲有方。戰守亦最用命。此番再募。務須慎擇將領。以撫馭之。而中堂亦時於賞罰之中。示以至公至仁。以振作其氣。蓋人無畛域。視之爲義勇。則彼亦以義勇報矣。視之爲官兵。則彼亦以官兵報矣。且賊之所用爲賊者。祇此土著之人。我之所用爲兵者。亦此土著之人。以土著破土著。尙有不足用乎。

一宜通廣莊以分敵勢也。用兵之道。宜明客主勞逸之勢。主則常逸。客則常勞。逸則常勝。勞則常敗。臺地自用兵以來。我兵多主守。賊兵多主攻。攻則致人。守則致於人。攻者出其不意。可以更番而迭來。守則無所不備。常虞顧此而失彼。故賊能以少而制我之多。我則常以聚而受制於散。今欲制之。必先多樹其敵。張其虛聲。使賊

亦有四顧受攻。奔命不遑之勢。而後可以反客爲主。轉逸爲勞。此其要道。既在多其進兵之區。更須傳招廣莊。以爲內應。按全臺大勢。漳泉之民居十分之六七。廣民在三四之間。以南北論。則北淡水南鳳山多廣民。諸彰二邑多閩戶。以內外論。則近海屬漳泉之土著。近山多廣東之客莊。廣民驍悍。銳器械精良。閩民亦素畏之。前漳泉械鬪時。廣莊不與。閩民亦無敢撓亂之者。此番逆首多係漳泉。廣莊初時各自團結。據莊爲守。以待官軍。今歲自二月以前。並未嘗投合於賊。無如官軍力弱。或阻於地勢。不能相衛。彼雖團結拒守。然無官軍以爲之主。聲勢既不相統領。力量又不足相當。其迫近賊界者。累遭焚殺。訴援無人。不得不依違其間。以求免旦夕之屠戮。究其心最爲可原。招之亦最易動。凡莊村各有頭家。此人便足主持此莊之一切。誠得重購募人。先通廣莊。令其陰相團結。送款來投。官軍一到。卽爲援應。如不能攻。亦不妨各豎反正之旗。以助聲勢。廣莊若爲我用。賊之疑備益多。多備則必勞。多疑則必叛。外勞而內叛。其爲坐擒之形必矣。

一宜專逆魁以速戡事也。現在南北所失諸地。俱未恢復。賊首有名字者。亦復錯處散布。不止一人。則用兵之所先。或北或南。不可不籌大局。伏思當前此南賊莊大田攻擾府城之時。南路自應爲急。鳳山初爲賊得。部署未定。賊衆又多在府城。宜遣一軍渡海。由打狗溪入鳳山。徑襲其虛。大兵扼其前。奇兵議其後。似可夾攻成擒。今南賊得地既久。守備必周。襲之無益。又聞其攻擾府城。數月不能得志。近知大兵雲集。亦頗有歛退自固之思。似可置爲緩圖。且聞鳳山一帶。路徑險阻。若大兵先清南路。恐相持需日。使北賊得以乘閒謀我之弊。且逆魁在北。而不在南。鄙意不如徑攻諸羅。諸羅地勢平坦。無險可守。此利於用兵者也。諸羅既通。便進攻彰化。以取賊巢。南路之賊。只宜別派一軍。領以大將。鎮扼附近府城險要之處。以攻爲名。以守爲實。使賊近不敢越府。

城而北。以爲牽制足矣。至北路既勝。則南路傳檄招之。必有梟賊首而來降者。固不待痛剿而服也。

一宜多閒諜以制勝機也。此行除各逆首外。其陷賊者大局當主撫然。其用力卻在於必剿。蓋賊之所以鴟張無忌者。以我軍之不能戰也。陷賊各莊。爲賊所禁格。雖欲自拔而出。其勢不能。我雖空言招之。不過破散其心。於事未必有濟。惟能剿進十里。則十里脅從之莊不招。自服。剿進百里。則百里之內不撫。自從。顧剿之道。當賊初起時。只須堂堂之陣。自足以爲聲勢。今賊勢廣袤。我軍雖有敢戰之兵將。然其勝負之局。與賊平分。未能操乎必勝。惟能用奇兵以振蕩之。虛實相生。使其脅亂不測。便有勝機。其要道莫先於用閒。閒得則可因勢而利導之。其疑也可驚。其虛也可襲。其逸也可勞。其堅也可陷。聞前此我兵之舉動。賊皆周知。而賊兵之虛實。我反不測。又如鳳山陷時。聞賊有決流灌軍。借甲贖城之事。及東城之戰。又爲坑陷以誘我師。此賊能用閒用奇。而我謀不周之失也。今宜不惜重金。廣募閒諜。必購知賊之腹心頭目。爲其謀主者幾何人。爲其任用者幾何人。其糧草足供幾時。其屯聚要害者幾處。其精銳之衆若干。其隨聲附和者又若干。其短長得失。親睦猜嫌之情狀若何。皆宜廣搜博探。盡得其虛實。便可購用反閒。以疊出奇師。或聲東擊西。或陽退陰進。或晝靜夜起。或條合條分。賊衆雖多。心必不固。苟能數驚數誤之。必可以制其死命。此在臨時相機決勝。非能預言。漢趙充國但廣用閒人以爲耳目。復神明於攻其無備。出其不意之二言。固已握全算矣。

一宜明約束以收人心也。賊之初起。諸彰雖破。人心未盡從賊。賊勢猶未蔓延。特賊以勢脅各莊。勒出供應之具。各莊懼其殘破。不得不供應之。官軍因其有交通之踪。於賊過後。頗聞乘勢焚搶。以爲破賊報功。其遠隔城郭。拒守以俟命者。官軍又不能救。各莊既無所依。所以從賊益固。賊勢益張。今於軍伍所到。務宜嚴申約束。凡

來降者。秋毫勿犯。其大莊遠隔賊鄉。不能挈衆而來者。但使先期送款。申明不敢藏匿逆魁。官軍到時。皆釋兵閉門。自燬其一切營柵拒守之具。便可勿問。所全既多。亦易成事。昔朱一貴之亂。滿制軍令民於各莊門閭及出入之衣帽等。書有大清二字。便釋不誅。今亦宜倣此意。示以生路。便足搖動其心。大信既昭。則人心自服。俟大勢已定。斯時雖有賊魁逆首。或應緣坐家屬。竄藏各莊。一經搜捕。不患不獻。此特一吏卒之事耳。固不必其先汲汲也。此節雖係老生之常談。實行軍不易之要道。伏惟留意。

蛤仔難紀略

謝金鑾

古之善籌邊者。卻敵而已。開疆闢土。利其有。非聖王所欲爲。顧是說也。在昔日不可以施於臺灣。在今日復不可以施於蛤仔難。其故何也。勢不同也。臺灣與古之邊土異。故籌臺灣者不可以彼說而施於此也。夫古之所謂籌邊者。其邊土有部落。有君長。自爲治之。其土非中國之土。其民非中國之民。遠不相涉焉。偶爲侵害。則慎防之而已。必欲撫而有之。有其土而吾民不能居。徒爲爭殺之禍。故聖王不願爲。而爲之者過也。若臺灣之在昔日。則自鄭氏以前。紅夷踞爲窺伺。海寇處爲巢穴。及鄭氏之世。內地之人居之。田廬闢。畝澮治。樹畜饒。漳泉民利其肥沃而往者日相繼。其民既爲我國之民。其地卽爲我國之地。故鄭氏既平。施靖海上。言以爲不當棄。朝廷聽其說。遂立郡縣。豈利其土哉。順天地之自然。不能違也。夫昔日之臺灣。與內地遠隔重洋。黑水風濤沙汕之險。非人跡所到。然猶不可棄。棄之則以爲非便。乃至今日之蛤仔難。則較爲密邇矣。水陸毗連。非有遼沓懸絕之勢。而吾民居者衆已數萬。墾田不可勝計。獨咨嗟太息。思爲盛世之民而不可得。豈情也哉。況楊太守入山。遮道攀轅。如赤子之覲父母。而民情亦大可見也。爲官長者棄此數萬民。使率其父兄子弟。水爲